

մանատարութեան բռնած վարանոտ կամ անբարեացակամ դիրքը արդար դժգոհութիւն էր պատճառում հայերին: Մարտ 26-ին Հայաստանի կառավարութիւնը զօր. Թոմսընին ներկայացրեց մի ընդարձակ յուշագիր, որով պահանջում էր անյապաղ լուծել Ղարաբաղի, Կարսի ու Շարուրի և ներգաղթի խնդիրները, ինչպէս նաև պարենաւորման, հաղորդակցութեան, տնտեսական ու զինւորական մի շարք հարցեր:

Մասնաւորապէս սուր վրդովում էր առաջ բերում անգլիացիների գործեւակերպը Զանգեզուր—Ղարաբաղի և Կարսի հարցերում: Կարսը այդ ժամանակ կառավարում էր թիւրքերի նշանակած տեղական կառավարութեան՝ Շուրայի ձեռքով, որը խիստ թշնամական էր տրամադրւած դէպի հայերը և աշխատում էր Կարսում պահել թիւրքիայի տիրապետութիւնը կամ, եթէ այդ անհնար է, ստեղծել Կարսի, Բաթումի և Ախալցխայի շրջաններից առանձին անկախ պետութիւն՝ Հարաւ-Արեւմտեան Անդրկովկաս անունով: Անգլիացիք չէին ուզում գրգռել մահմետականներին և զանազան պատրւակներով արգելք էին լինում, որ հայերը գրաւեն Կարսը: Հայաստանի կառավարութեան յամառ պնդումների վրա, 1919թ. յունւ. 8-ին, Արեւմտեան Անդրկ. բրիտանական ուժերի հրամանատար զօր. Ֆորեստիէ—Ուօկերի և Հայաստանի արտ. գործ. նախարար Ս. Տիգրանեանի միջև կնքեց Կարսի մասին մի համաձայնութիւն, որով, մինչև հաշտութեան դաշնագրի ստորագրումը, Կարսում պիտի նշանակէր անգլիական զինւորական նահանգապետ, քաղաքացիական իշխանութիւնը պիտի կազմէր հայերից և զինւորական նահանգապետի ենթակայ՝ վարէր պիտի քաղաքի ու նահանգի քաղաքացիական գործերը: Հայկական պաշտօնէութիւնը պէտք է պատրաստ լինէր Ալեքսանդրապոլում և յունւ. 12-ին զինւ. նահանգապետի հետ պիտի անցնէր Կարս: Համաձայնագրի մէջ մանրամասն նշանակւած էին երկաթուղու և հեռագրի ու փոստի թուրքերից փոխանցելու աստիճաններն ու կառավարութեան եղանակը. — մինչև Կարս բոլորովին հայ պաշտօնեաներ, Կարսում՝ խառն, սահմանում՝ թուրք-անգլիական՝ զինւ. նահանգապետի հսկողութեան տակ:

Համաձայնագրի 10րդ և 11րդ կէտերում ամփոփւած էր ոչ-հայ տարրի կառավարութեան ձեւը. յիշում էր, որ մահմետականները վախենում են հայկական վարչութիւնից, հետեւաբար, անհրաժեշտ է գործել զգուշութեամբ և ցրել ամէն վախ ցոյց տալու համար, որ հայերը ընդունակ են մոռանալու ցեղային նախապաշարումները, երբ որ իշխանութեան գլուխ են կանգնում»: Մասնաւորապէս հրահանգում էր խիստ լինել ժանդարմների գործած ձնշումների և բռնութիւնների դէմ. «Սա կը լինի հիանալի յաջողութիւն հայկական իշխանութիւնների համար և կառավարութիւնը արժանի կը լինի դաշնակից պետութիւնների շնորհաւորութեան, եթէ մինչև Անդրկովկասի ապագայի որոշումը հաշտութեան խորհրդաժողովի կողմից, անդորրութիւնը չխախտուի»: (10րդ կէտ):